

Les Bieautés d'la Natuthe

par Frank Le Maistre

Tch'est qu'ch'est qu'la natuthe, la bieauté et l'èrpos?
Comme tchi admither tout tch'est à l'entou d'sé,
Les mèrvelles dé la campagne – les pliantes et les ouaisieux,
Les bouais et caetera – comme tchi s'exprimmer?

Lé ciel en d'ssus d'nous et not' vièr anmîn l'malzard,
Les nuages et la plyie et même les brises étou,
La "lanterne d'la pâraisse" et les p'tites étailes sus l'tard;
Véthitabyement i'y'a d'la bieauté dans tout!

Et ch'est pour touos nous qué ches belles choses ont 'té faites,
Pour lé pauvre comme pour lé riche – médgian ou moussieu;
Dévrai, mes bouonnes gens, la natuthe est compliète,
Mais ch'est â nous d'réaliser qué ch'est l'don d'not' Bouôn Dgieu.

Qué ch'sait jour ou niet tout est cèrtainement merveilleux;
Calme ou rude, eune arsion d'chaleu ou qu'la froid vos pique,
N'importe! La bieauté est visiblye à tout obsèrvateur,
Et l'naturaliste sait qué tout est mangnifique.

Parmi les ouaisieux la Création est vraiment supèrbe;
R'gardez seulement la rouoge-gorge, un doux p'tit anima,
Si apprivoaisi et si d'licat, mais, tchi chef d'oeuvre!
Dévrai, innouothant est l'homme tchi n'vait rein d'tout chenna!



Tchi musique tchi pourrait compathaître à la vouaix d'eune grive
Ou à un mêle sus la branque à sinne dé jeu?
Lé violon n'est rein, toute musique est artificielle
A compathaître à un ouaisé - la musique du Bouôn Dgieu.

Pour la paix et la bieauté, èrgardez alentou d'vous,
Est cieus, sus la tèrre et dans l's ieaux – en d'ssus et en d'ssous;
Sus la grève, dans les valettes, côtis et ruettes; dans l'ciel.
La Natuthe pour mé! La Natuthe et ses mèrvelles!

Go to the Learn Jèrriais website to find the audio version of this...
www.learnjerriais.org.je